





國家圖書館 NATIONAL CENTRAL LIBRARY, TAIWAN, R.O.C







國家圖書館 NATIONAL CENTRAL LIBRARY, TAIWAN, R.O.C






國家圖書館 NATIONAL CENTRAL LIBRARY, TAIWAN, R.O.C.





國家圖書館, NATIONAL CENTRAL LIBRARY, TAIWAN, R.O.C.




242828 v.18

鈔本

羣碧石樓

國家圖書館 NATIONAL CENTRAL LIBRARY, TAIWAN, R.O.C.



錦里耆舊傳卷第五

起中和五年正月
至蜀武成元年

前榮州應靈縣令勾延慶纂

正月地動一月十餘度以七曜占之多兵饑饉 三月改

光啓元年 夏四月維州山崩石墜飛塵滿空 五月除

授顧彥朗東川節度使

二年東川遣鄭君雄率眾侵畧至德陽縣殺破斬鄭君雄

又常厚自峽中率兵據左綿僖宗皇帝到京後天下十道

共修京闕之次胡魯子反燒悉盡駕幸寶雞又幸山南干

戈復起四海不寧


三年冬十月十軍軍容使田令孜除授西軍監軍使十一

月到府

昭宗皇帝即位改元文德元年 秋八月除授韋太尉昭

度劔南西川節度使陳太師知之乃治兵講武更置黃頭

錦里耆舊傳卷五



NATIONAL CENTRAL LIBRARY, TAIWAN, R.O.C.



軍三都監軍使以書召閬州王司徒建計其過綿水即出兵拒之將激其怒必攻諸州所在發兵交戰冀韋太尉來以兵隔之則誣以王司徒起兵侵境 九月王司徒大軍至閉城門不納 冬十月丁卯川軍與王司徒戰川軍敗退入城是日天色陰慘先主廟上黑霧起至暮王司徒抽軍回七里亭 丙子王司徒引軍入漢州界攻剽四面州縣東西兩川皆懼之

龍紀元年春二月庚午陳太尉發軍與王司徒大戰於三郊川軍敗績於是別修壕寨點丁守城 夏四月軍容招前定戎軍節度楊晟建節於彭州與陳敬瑄為裏也 五月三郊軍敗退歸府城王司徒據漢州城出軍把斷北路又彌牟鎮下先鋒寨新都縣下中軍寨 秋七月節度使韋太尉到川用王司徒為衙內都指揮使奏割邛蜀黎雅

四州充永平軍節度使川庄陳太師牢城韋太尉具旌節於城下以示城內百姓軍人告之曰新使在此何閉城門陳太師令左右詬罵城下云有鐵券見在豈可違先帝命乎王司徒於東北面下寨韋太尉城西北下寨未經旬日嘉眉州降

大順元年春正月分兵擊邛州都知兵馬使任可知殺剝史毛湘以城降又東川助兵三千人城外置牢行府徵料諸州稅賦嘉眉州運糧供軍內饑乏死者不可勝數父母季棄雛稚不相保養居人多以藜藿充濟皆有菜色殍仆者甚衆軍人多偷刈新麥每一斗直二十餘金亦潛於韋太尉寨市易鹽酪相次人數稍多遂成隊有聞於太尉太尉曰一城飢餓忍不救之並不要問城內亦有聞於陳太師太師云吾尚恨無計救卹一任逐便以此稍有市井



夏五月城內乏食民俗惶惶遁相欺凌無有怕懼所在斬殺處處暴尸其有軍都處則獨開別街巷則寂靜是月資雅黎三州相次歸降時以攻圍日久其城未拔王司徒白韋太尉曰今領數萬之衆勞師以事變夷近聞洛陽以來藩鎮相噬朝廷姑息不暇主上憂勞不如以兵威靜中原是國之本相公盍歸觀面奏此事韋公然之翌日又諷三軍於行府門告糧闕乃執韋公親吏駱別鶴鸞而食之韋公益懼因召王司徒謂曰某年衰風恙恐不任持已具奏聞即便離任今表申奏署授司徒節度留後行營招討使候至闕庭奏聞請降西川旌節在後更保功業以慰民望乃以牌印授之 六月己卯進發王司徒祖餞送至新都韋公請回無更遠離帳幄韋太尉發後王司徒移居中軍寨城內百姓往來交易販米入城以竹筒量膏截筒深一

寸潤一寸二百文須三五人共賣一人接錢兩人把手定則以米馮衣袖中將歸研之煮湯共喫老弱者難買或聚或散固無行鋪街巷飢人死者無數或遇一夜風雨來日便成白骨 冬十月發兵圍彭州

大順二年秋城內糧盡 八月庚寅陳敬瑄田令孜開城門携牌印出降王司徒與之並轡入城安撫軍人百姓放陳太師歸花林坊本宅田令孜歸碧雞坊宅時克定川府之後以萬民久罹塗炭初見廓清行滌蕩之恩布寬仁之令

景福元年春有詔貶田令孜授湖南監軍陳敬瑄於雅州安置王司徒慮其生變縊令孜於府城斬敬瑄於新津具表疏其惡也

三年夏彭城內寔慶初年米每斛五千第二年十千三年



糧盡百姓遞相啗食 五月庚申楊晟自劾城門開自景福元年五月二十日圍城至三年五月二十三日首尾三年蓋楊晟不識天時致害民庶 秋七月與東川顧相公修好結秦晉之姻是歲改為 乾寧元年

二年春三月創徵雜稅綾一疋一百文絹一疋七十文布一疋四十文豬每頭一百文時修寶曆寺有僧智廣俗姓崔氏善治病以竹片為杖拍其痛處決之無不立愈癮者便伸跛者能行其餘疾苦應手痊損川主司徒崇重之請於寶曆寺為人療病所得錢物回用修造遂於寺內五丈天王閣下居止於是病者競來皆得痊愈日獲三五千告諸貧者不用施錢時號聖僧師本在雅州開元寺攝帝神堂內居

三年起軍收東川
四年秋九月平定東川

五年秋九月改為 光化元年江瀆池魚無數皆死浮出水面長尺餘以車般之送於城外


二年秋八月差發決雲軍使田師儼統押兵士三指揮收獲閬州次克巴蓬壁三州

三年春三月田師儼移軍收渝州

四年改元 天復元年封蜀王
二年春三月發舟師一萬五千人鎖峽是歲大水嘉州漂蕩尤甚時有呪土僧念尊勝修淨眾寺


三年三川晏寧五掾豐稔梁漢夔峽東西五千餘里山河蕭靜

六年昭宗皇帝遇害 少帝禪位梁時三軍縞素舉哀
七年秋九月文武勸進群議 云蜀王即皇帝位改唐天復七年為武成元年郊祀天地大赦境內赦文曰圓蓋方



與萬彙共資其覆載春生夏長四時不息於推遷所以茂
成歲功寧遂物性帝王取象文質遞興遵革故之令猷敷
鼎新之至理朕上膺天命俯徇樂推宗廟告虔孝思旣展
郊丘備禮嚴配式遵欽承享國之符允叶奉天之道祀群
咸秩有感必通雲龍方覩於在天雷雨須聞於作解且湯
開三面延景祚六百餘年漢革五刑繼丕圖二十四世皆
以恤辜宥罪勸善興仁特行滌蕩之恩用致洽平之化自
唐朝運改土德數終初乃召寇以纏兵竟至遷都而滅國
賢良塗炭朝市丘墟生人既失其所天大事須歸於有土
遂至蠻夷瀝款士庶傾心謂蜀都同章武之時兼漢嗣絕
山陽之號共陳天命屬在朕躬一從踐位已來倍軫臨深
之懼每念生民塗炭刑政猶繁因告類於穹昊合流恩於
屬縣紀年定曆既正鴻名布澤行春式和均氣可大赦天

下改唐天復八年爲大蜀武成元年正月十日昧爽已前
大辟罪已下罪無輕重已發覺未發覺已結正未結正見
繫囚徒常赦不原者咸赦除之唯十惡五逆者屠牛鑄錢
固意殺人捏窠造印結聚徒黨逃走背軍合和毒藥私鹽
茶麪持杖行劫官典犯枉法贓兼淪濫身名冒授官爵固
圈之內官吏用情致令寬濫不問有賊不在赦限左降官
不問罪輕重並與量移其有情無狡蠹事不 邪者委中
書門下酌量矜貸使與摩復授官州縣典吏及諸色人配
流在遠已經懲斷者並宜釋罪放歸兼有軍人百姓先因
公事關連逃避諸州縣鎮不敢放歸還者亦任却歸本貫
所在不得勘問擾攪朕自援旗誓衆仗鉞平戎廓定封疆
安保生聚克成帝業實用武功每思將帥之勞宜贖初終
之効其在城及東川山南武定武信武泰等道并兩路前




軍諸鎮都頭節級將士等一時即位日雖已各有頒賜既經大禮更示殊恩應都兵知馬使已下至節級官健今有優給各有等第處分稼穡雖登黎元未泰每於旦夕常所焦勞將漸致於昭蘇已累行其矜放但念方屯師旅難闕賦征祿同切於人安宜共資於贍給自去年八月已後十月已前繼有指揮併蠲逋欠非無惠澤下及蒸人尚慮疲羸未息艱苦畿內諸州及諸州府應徵今年夏稅每貫量放二百文今年正月九日已前應在府及州縣鎮軍人百姓先因侵欠官中錢物或保累填陪官中收沒屋舍莊田除已有指揮及有人經官收買外餘無人射買者有本主及妻兒見在無處營生者並宜給還却據元額輸納本戶稅賦冬選之人例聞鬻旅常恩任用以收棲遲兼勸進官僚人數不少朕昨纔登寶位更布偏恩或擢在班行或委

之州縣凡選用畧盡搜羅其間或有謬結前銜妄稱入仕既未辨其真偽又可哀其困窮是用銓衡畀分玉石切在精研選士撫實推公自執規繩勿隨請託但曾經赴任委不敗官不犯刑章又無贓污告赤匱備考課分明便仰依資注官銓司不得稽滯如有失墜告赤無以自明但有失墜時公憑及於本任官處取得文解者並准例舉選然則自唐朝兵革之後淪濫尤多附勢力者未必有材抱孤直者或聞無位自今已後委有司博求幹濟慎擇端良諳熟吏途詳明法律先能潔己方可理人就中令錄之尤難切在銓衡之精選或有節度刺史上表論薦皆須審諸行事顯著才能保無苛虐之心方允奏陳之命如聞失舉必罪所知諸州府或有賢良方正能直言極諫達於教化明於吏材政術精詳軍謀宏遠韜光待用藏器俟時或智辨過




人或詞華出格或隱山林之跡或聞鄉里之稱仰所在州府奏聞當與量材叙用自唐室傾淪梁園篡奪上國俄成於茂草中原莫有其遺民三百年之文物一空數千里之生靈無主星辰既紊運祚俄遷指王氣之束沈聽頌聲之西起率土之黔黎老幼竟獻臣心滿朝之文武忠賢皆陳天意克隆其業合重獎酬應內外文武官等或賜功臣名號或與一子出身兼進勸官資以旌勲業並當續有處分朕頃事唐臣嘗居親衛受藩鎮封崇之貴著冊書鍾鼎之勲至於朝右公卿方面侯伯皆契忘家之誓俱同許國之誠其歿身王事之中遇禍賊庭之內言念及此痛憤良深應自僖宗朝凡在有功文武大臣顯忠孝者並委中書門下追贈仍搜訪骨肉量材錄用又在閬州起義之日應有隨駕大將効命功臣或遭疾以淪亡或當鋒而夭枉皆是

捐軀為主臨難喪生殊功無日而暫忘遺烈千年而不泯並委中書門下抄錄次第各與追贈有子孫者特授官榮所冀澤被幽明仁霑存沒又自朕剖符之始分闡已來副予委用之心臣贊勲庸之士同甘共苦竭節輸誠推公不避於流言臨事唯思於盡瘁則有故武信軍節度使張琳操持勁直才術縱橫成今日之鴻基自斯人之懿績不享朝天之祿遽興失手之悲言念前功常思厚報宜追贈太尉以報幽寃其嗣子更加正官仍賜章綬故山南節度使王宗滌早膺任用累著勲勤征行不憚於風塵陳敵常先於士卒論其實効可謂勞臣無何以富貴生驕災殃自掇不守初終之節遽萌悖慢之心驗人情而共憤滿盈定國法而難私斷割遂行典憲深用矜傷當景運之初興在功臣之可念宜加洗雪用慰幽冥宗滌並却還在身官爵故



茂州刺史張造故蜀州刺史李師泰故邛州刺史李簡故
眉州刺史張勅故漢州刺史宗裕都知兵馬使劉璋奉禮
蓋獲張全真張行立韓在田威等並宜追贈朕自臨蜀國
實庇齊民皆資先哲之威靈獲王故都之城邑方憑幽贊
以永天休上答玄功宜尊舊號先主昭烈皇帝宜委中書
門下追崇尊號 備冊儀忠武侯諸葛亮別加美謚追贈
王爵應有名山大川靈祠聖跡皆豐凶所繫水旱是司並
宜追贈公侯酬玄貺朕爰自統臨八國同心諸藩部落首
領已下宜差使臣各賜詔勅分物宣諭其見在鴻臚禮院
入朝藩客等各賜分物續有勅旨處分刺史縣吏令身皆
受職寵在分憂非唯効答於恩榮亦在保全於終始將申
報國只計安人其有徭役不均刑法不中鄉縣凋弊賦賦
通懸必當分命使臣大明黜陟若清廉可獎課績有聞或

就轉官資或超加任用並舉勸懲之命以彰悔過之名太
倉及諸州縣受納斛斗並仰太府寺准舊例校勘逐年給
付所司除本分耗剩外不得加一勝一合致百姓積累逋
懸如有固違必行朝典其有外州遠縣官吏等輒徵估價
並許百姓詣闕論訴不計官職高卑並正刑名處分在京
百司禁囚徒推劾案成皆招本罪本官詳斷只據所申倘
陷深文便行極法或恐推司人吏抑遏代書既不坐其本
情實慮遭其枉法自今後委御史臺常加覺察若有寬濫
便具奏聞必當別遣推窮重行懲斷致理之源無先養老
化民之本尤在恤孤或矜黃髮之年或念白華之節衰老
者宜加 卹孤嫠者亦在撫安應國內有耆老年八十已
上賜米二石九十已上賜米三石一百歲已上賜米五石
兼綿絹酒肉有差並仰所在長吏切加安存其有不幸者



錦里耆舊傳卷第五

員官赦內有未該恩例及合條流事件各仰所司起請施行開國之初旣勤行於德惠改元之後允企望於樂推惟是革弊從新去華務實有利於民者不得不用有害於政者不得不除公平必致於民安富庶自成於國霸恩雖不怯法且無私赦宥者各仰自新矚革者皆宜共守俾從滌蕩永致清平敢以赦前該恩事相告者以其罪罪之挾藏軍器亡命山澤百日不首復罪如初赦書日行五百里仍付所司牒呈准勅故牒

量與津置殯送仍撫其孤弱義夫節婦孝子順孫並加旌表門閭終身優假國之教化庠序為先民之威儀禮樂為本廢之則道替崇之則化行其國子監直令有司約故事速具修之兼諸州應有舊文宣王廟各仰崇飾以時釋奠應是前朝舊制或有闕國新規制勅之所未該教化之所未備或刑法不中或倫序有乖則諫臣不可不言宰執不可不奏且諉木之設本俟諍臣匭函所收先覽寬狀所以凡關利病悉要聞知自今已後或事有便宜理非允當並須旋具論奏共議改更必當留折檻以旌賢無或懼觸鱗而避事應南郊行事亞獻終獻攝事行禮官吏等改轉優賜並候續勅處分應飛龍閣廡內作器仗諸雜工巧黃衣三衛四色細仗掌扇黃鍾典彭等亦各委所司分析姓名申奏當議優賞駙馬都尉普恩之後仍各賜一子八品正



錦里耆舊傳卷第六

起武成三年盡
同光四年春

前榮州應靈縣令勾延慶纂

三年大梁遣使通聘書曰夫唐虞致治遵禪讓之明文湯
武開基允神人之至願必有神器是膺皇圖况古今迭代
之期英豪興隆之數莫不上關天命下順人心啓王霸之
宏機爲子孫之大計咸遵軌轍並載簡編且念與皇帝八
兄頃在前朝各封異姓土茅分裂皆超將相之尊魚鷹往
來又約弟兄之契歡盟甚固功業相推俄阻絕於音塵止
因緣於間諜以至時衰土德運應金行雖手足胼胝粗平
多難而星辰符瑞謬付朕躬當百辟之群情極四方之積
惠爰都河洛用答乾坤尋聞皇帝八兄奄有西陲盡朝三
蜀別尊位號復統高深一時皆賀於推崇兩國願通於情
好徵曹劉之往制各有君臣追楚漢之前蹤常分疆宇所



錦里耆舊傳卷第六

起武成三年盡
同光四年春

前榮州應靈縣令勾延慶纂

三年大梁遣使通聘書曰夫唐虞致治遵禪讓之明文湯
武開基允神人之至願必有神器是膺皇圖况古今迭代
之期英豪興隆之數莫不上關天命下順人心啓王霸之
宏機爲子孫之大計咸遵軌轍並載簡編且念與皇帝八
兄頃在前朝各封異姓土茅分裂皆超將相之尊魚鷹往
來又約弟兄之契歡盟甚固功業相推俄阻絕於音塵止
因緣於間諜以至時衰土德運應金行雖手足胼胝粗平
多難而星辰符瑞謬付朕躬當百辟之群情極四方之積
惠爰都河洛用答乾坤尋聞皇帝八兄奄有西陲盡朝三
蜀別尊位號復統高深一時皆賀於推崇兩國願通於情
好徵曹劉之往制各有君臣追楚漢之前蹤常分疆宇所



冀同清夷夏俱活生靈載籍具存恢張無爽去歲密聞風
旨遐想寤思憤岐隴之猖狂逼褻斜之封徽欲資牽制用
速掃除遂委永平軍節度使劉鄩特遣行人先導深意旋
已徑差精甲特擊妖巢念數鎮之驍雄鼓六師之威勢尋
聞退遁殆至滅亡允懷犄角之謀尤得輔車之利近併覽
同華之奏報皆進呈宸祥書題具悉事機良多觀沃今專
馳卿列備達衷懷重論金石之交列卜壩麓之分山河共
永日月長懸瞻竚好音言不盡意今遣光祿卿盧珙閣門
副使少府少監李元聊馳書幣專戒道途兼有微禮具在
別幅謹白

馬一十四匹紅纓子鞍轡各一事

紅耳叱驂馬一匹金玉開裝四垂鞍轡一副

紫叱驂馬一匹白玉裝鞍轡一副

白驄馬一匹金鍍開裝鞍轡一副

烏叱驂馬一匹金鍍龍鳳五垂銀鞍轡一副

烏叱驂馬一匹金鍍銀開裝鞍轡一副

青叱驂馬一匹裏花五垂銀鞍轡一副

青叱驂馬一匹陷金玉五垂鞍轡一副

騮叱驂馬一匹金鍍開裝五垂銀鞍轡一副

紅耳叱驂馬一匹金鍍五垂開裝銀鞍轡一副

玉犀腰帶二條并雜物等

黃排方珮琳腰帶一條頭尾順缺十二事

通牡丹犀排方腰帶一條頭尾順缺十二事

金香一十斤

麝香五十斤

犀一十株

琥珀二十斤



金梭琉璃椀十隻

玳瑁二百斤

金花銀裝厨子一對

金花潭銀裏龍鳳儀注捨四條

并鞞子犍牛紅排子全

金花銀裏龍鳳儀注捨四十條

綾袋盛

金銅甲二副并副膊兜鍪全

藥物一十三味

茯苓一十斤 茯神一十斤

酸棗仁五十斤 玉鹽五斤

新羅人參一十斤 牛膝一十斤

枳殼一十斤 五味子五斤

赤箭一十斤 鹿茸一十對

顆棗一千枚 羚羊角五對

牛黃一百銖

右件藥物等或來從燕市或貢自炎方或馨香能助於熏爐或華妙可資於寶玩至於劔涵星斗藥有君臣願伸兩國之情重固千年之約愧非禘禮粗達深衷特希檢留幸甚謹白

答書

大蜀皇帝謹致書于大梁皇帝閣下竊念早歲與

皇帝共逢昌運同事前朝俱榮倚注之恩並受安危之寄

豈期王室如燬大事莫追摸流泛濃於八方衰疊凌夷於

九廟此際與皇帝同分茅土共統邦家扶危者力旣不宣

握兵者計無所出甚忝列同盟之分幸居平蜀之功所宜

治兵甲以固封疆聚征賦以修進貢望星使而經年不至

指雲鄉而就日無期遠聞皇帝應天順人開基立極拯生

靈於塗炭示恩信於豚魚東南之王氣咸歸河洛之殊祥

畢至四門盡闢百度唯貞 無競於興邦止施仁而濟衆

© 2007 NATIONAL CENTRAL LIBRARY, TAIWAN, R.O.C.



以此內量分限不在經綸七十州自可指揮八千里半因
開拓遂至萬民叶議八國言朝爰徵史冊之文亦有變通
之說且東漢亂離之後三國齊興西周微弱之時六雄競
起俱非恃強逼禪皆以行道濟時雍容於揖讓之前輕重
於英雄之內况西蜀開山立國燒棧為謀稱雄雖處於一
隅避狄曾安於二帝鼎峙之規模尚在山呼之氣象猶存
永言梁蜀之歡合認弟兄之國今蒙皇帝遠再舊好專降
嘉音俱無間諜之嫌再叙始終之約疑慮則春冰共泮開
通則東海可歸光榮遽被於子孫暢遂咸敷於朝野今則
盡雉勞而巳用儉勤以歸資嘗瞻偃草之風以繼用天
之道又蒙厚加賜貶別降珍奇十驥連鑣六龍並駕稱德
曾參於萬乘呈才皆過於千金載觀戀王之心並勵懷恩
之志寶帶輟異方之貢名香加遠國之珍奇鋒利過於雪

謝信物等

霜雅器價齊於金玉入用多慙於未識捧持方喜於初觀
望恩而一日三秋仰德而跬步千里自此榮遵天路繼道
星槎緘章不俟於飛鳶裂帛豈勞於繫馬欣榮慰喜併集
於此時敬以專使盧卿等回畧陳所志幸望開覽謹白

右件鞍馬及腰帶甲冑槍劍鷹麟琥珀玳瑁金校梳
越甕器并諸色藥物等皆大梁皇帝降使賜賜雕鞍
撼玉堅甲燦金十圍希世之珍六轡絕陳之用槍森
地檜劍耀龍鋒金校含寶梳之光祕色抱青甕之響
上藥非蜀都所紀名香從外國稱奇遠有珍華並由
惠好顧酬謝而增愧仰渥澤以難勝捧閱品名實慚
祇受

二年春冊皇太子



永平元年秋九月築柳堤

二年秋七月皇太子元膺作亂樞密使唐道襲等率兵敗之至翌日擒獲戮之於摩訶池畔 初五月二十三日丑時天上忽震一聲有電光飛數丈或明或潛滅皆云天狗也占其下殺萬人至是勦戮之數也斯驗矣

三年冬十二月雲南蠻寇遶大渡河至沅黎

四年春正月曩王將兵討之殺退瀾河者不知其數歸降者三千餘人斬獲坦縹布燮清平官等收奪器甲馬牛軍資財用八千餘事凱歌而還是月荆南高令公發兵攻峽路嘉王率衆且戰艦沿流下峽未至曩州刺史王先成已殺退嘉王以王先成伐功悔慢斬而後奏帝甚怒之

天漢元年戎州界獠胡連等反七州捕盜使王球領兵討平之

光天元年春三月西域胡僧滿多三藏來游峨嵋山却歸

西國 夏六月帝崩 太子衍即皇帝位改元乾德 秋

八月先皇 陵

二年春正月有事于南郊大赦國內 二月雲南遣使朝

貢 夏六月雙虹頭入福感寺後堂內光輝照溢廊宇良久而沒

三年春三月築子城西北夾寨堤引水入大內御溝水出

東流仁政樓

五年春二月丙午日有食之

六年春雲南進江豬 夏四月於大內造村坊立市肆令

官嬪着青布衫裙開酒肆食店雜男女之飾貨柴麪一如下民間叫噪爭打男女混雜交易而退帝與諸妃后以為

笑樂




咸康元年夏六月續添閏十二月曆日一紙印造施行春
初頒曆只以十二月暨至夏方知唐朝曆日閏添之也是
歲遣翰林學士歐陽彬通聘洛京回莊宗皇帝遣客省使
李嚴來修好嚴朝見笏記曰伏自朱溫肆逆運屬昭宗三
年痛別於西秦一旦逼遷於東洛誅殘南地焚焚官闈雖
列藩悉是於唐臣無一處不從其僞命繇是大唐中興皇
帝念高祖太宗之業倏爾隳張憤朱溫崔胤之徒同謀篡
弑遂乃神機迴發心鼎獨燃竭滄溟而誓戮鯨鯢艾林莽
而決除虎兕十年對壘萬陣交鋒而久困於生靈而再逃
其死士纔過汾水縛王鐵槍於馬前旋及夷門斬朱友貞
於樓下劍霜未匣槍雪猶輝段凝統八萬雄師倒戈伏死
趙嚴知一人應運引頸待誅遂使賊將寒心謀夫拱手取
乾坤只勞於八日救塗炭遂定於四方備振皇威感遵帝

力令則秦庭貢表兩浙稱臣淮南陳負拜之儀回統備朝
天之禮纔安宇宙便息干戈未盡臯夷方議除翦豈謂大
蜀皇帝柔懷遠適居安慮危喜我帝祚中興羣妖悉滅特
遣蘇張之士來追唐蜀之歡吾皇迴感於蜀皇復禮遠酬
於厚禮臣則叨承玄造獲奉皇華載馳得面於天顏戰汗
不住於跼地臣無任感恩荷聖踴躍屏營之至 冬十月
庚申朔甲子帝幸天雄軍秦州即天雄軍文武臣僚諫諍不允駕
至利州唐國發大軍已過金牛帝大驚倉促從百官旋各分
散輦轂倉皇奔馳歸闕 十一月庚寅朔丙申帝歸入內
京城沸撓至壬寅唐國使李嚴走馬入城宣唐勅命安撫
三軍萬姓又云六軍使齊王宗弼先已有狀歸降興聖太
子今見引領大軍相次即到帝與太后一時號泣左右息
哀帝遂召歐陽彬修降表曰 臣聞滄海澄波納百川朝



宗之水皇風扇物來萬方向化之人蓋由負罪不誅銜寬
獲免鄭伯沐焚棺之惠許男荷解縛之仁得不頂戴宮旻
仰祈渥澤恭惟皇帝陛下承乾啓運握鏡開圖發機而上
應天心恤物而下民從欲繼十八祚崇隆之德高步泰階
應一千年提時之風廣施王道混車書於天下走聲教於
域中而臣僻在遐方遠居蜀部承先父經營之業為巴人
主者之司但荒髻贅之迷罔顧危亡之患玉帛既乖於正
朔苞茅是闕於薦羞殊不知唐德惟新玄功再造致王師
之遠辱勞雄武以遐臨太陽照而冰雪自消奢澤敷而黔
黎蠹泰而臣自知罪豐不敢運逃命戎士以倒戈望壺漿
而塞路遂即舁棺麾下束手馬前向丹闕以馳兔掩黃沙
而聽命豈謂魏王布忠貞宰垂仁入臣境無犯緘毫間臣
罪不加一二傳陛下好生之旨闡堯天 惡之文釋殘生

於蛾撲之燈全必死於戲魚之鼎使肌膚重生於聖日集
枯再沐於天波然則盡節輸誠安足以贖臣之罪塗肝碎
膽不足以報君之恩幸得捧日傾心歸明向化積懼而鋒
鋌聚背推忠而丹赤貫心今則已遠龜城將趨鳳闕雖亡
家國喜歸有道之朝縱別鄉園幸在太平之化臣以正月
二日與母親并姨舅兄弟國肉等發離當道奔赴京師攀
望聖慈無任瞻天仰德惶懼戰越死罪之至發表後魏王
車駕至漢州 乙巳王宗弼領兵先入城是夜王宗弼遷
帝於西宮至丙午自稱兵馬留後散差人收內庫金銀寶
玩并諸王節相宅內財物 戊申勅勝曰朕以蜀部封疆
本是我唐境土爰從兵革遠阻江山當為梁篡弑之時致
宗廟陵夷之難遂茲割據蓋逐便安雖行建號之謀乃是
從權之道况復蜀主先父素是本朝舊臣常懷忠孝之心



每俟興隆之運唯期恢復却數傾輸朕以初殄寇讎重興社稷撫諭之恩既廣優勤之意常深須務綏和貴諧混一遂令元子兼命宰臣遠安倭后之心既叶來王之願遐想王師行李已及彼地城池遠降詔書明行示諭料其素志必契夙心當符魚水之歡永保山河之誓應僞蜀文武官僚等或本朝舊族或本朝舊賢或挹節於軍戎或者著名於鄉曲又從睽隔常賑情懷宜知乃暎之恩各勵歸誠之款今以降勅命誠約諸道兵帥如西州果決歸明到城內不得驚擾但思効順勿致懷疑 己酉齊王宗弼斬東院開府宋光嗣西院開府景閏澄北院開府歐陽冕成都尹韓昭等出榜示秦魏王教令宋光嗣等又居內庭恣行權柄幻惑少主域削三軍仰處斬訖奏 甲寅蜀主與宰臣王楷文武百官素服銜璧牽羊輿襯出城降魏王太子於是

焚襯釋罪望北拜恩却歸入城魏王遣李嚴於三市慰諭軍人百姓 丁巳魏王興聖太子入城 閏十二月己丑朔斬僞齊王宗弼并男駙馬都尉承班等榜曰 竊以前件人等擅廢本主專殺內臣潛取資財將為己物爰自收降城邑又無犒賞三軍俱是元兇須加顯戮初王宗弼多收內庫并諸節將宅寶貨於城外獻魏王及招討郭令公魏王曰蜀之山河皆我家之有方欲普施惠化何用寶貨而為遂不受至是誅之又斬秦州節度使王宗休以其修行宮迎蜀主又引軍收蜀竊以王宗休食人之祿於國不忠貴擁節旄位居屏翰飾宮室以誤主引師旅而收城恃逆之深莫甚於此豈可君遷臣在國改家存顯示梟夷神人權快

同光四年春正月戊午朔前戎州刺史蕭懷武眉州刺史



鮮于臯作亂擒獲與從皆伏誅 庚申蜀主及太后嬪妃
 宰臣王楷庾傳素張裕許寂等進發入洛歸朝 甲子走
 馬使到宣勅斬招討使郭崇韜父子四人為到蜀取豪富
 家金錢馱載歸京闕戊申奏遂降勅誅之 甲戌北都留
 守孟知祥除授同中書門下平章事充劍南西川節度使
 到府 戊寅魏王以孟公至大慈寺拜禧宗御容又至延
 祥院見偽蜀少主真容並令掃抹塑北方天王一身至今
 存焉 庚寅魏王發離成都歸京至綿州康延孝以殿後
 軍作亂回趨成都屯廣漢川主頗有憂色護軍焦彥賓指
 畫討伐與東川節度使董璋會軍擒康延孝送至利州魏
 王斬之於是兩川平定 夏四月丁亥朔己丑蜀主與母
 徐氏太后諸王公 嬪妃至雍州時莊宗出征王皇后矯
 詔就秦川驛害之至明宗朝追封順正公葬于京兆府三

趙村是月明宗即帝位改元

天成元年甲午魏王平蜀回至渭南諸軍潰散為帳下親
事所益

錦里耆舊傳卷第六



錦里耆舊傳卷第七


前榮州應靈縣令勾延慶纂

二年春二月壬午朔己亥川主斬兩川監軍使李嚴時明
宗篡位川主以前朝懿戚心不自安至是內宥省李嚴承
樞密使安重誨密旨貯圖謀之意添鄰部網羅於兩川乃
斬之間奏自是方思割據厲兵秣馬與東川董相公璋論
秦晉之親結唇齒之約

三年冬築羊馬城

四年春飢糞米斛四百文

長興元年秋兩川起兵討遂府利闕并黔南夔萬等州勝
示曰 蓋聞皇王御下恩信垂而叛離臣子事君猜忌生
而權變固不可割席而忍耻膠柱 移音開戶牖以啓式
長根芽而稔患以至舉戈問罪誓衆言征旁庇齊民式求



錦里耆舊傳卷第七

前榮州應靈縣令勾延慶纂

二年春二月壬午朔己亥川主斬兩川監軍使李嚴時明
宗篡位川主以前朝懿戚心不自安至是內宥省李嚴承
樞密使安重誨密旨貯圖謀之意添鄰部網羅於兩川乃
斬之間奏自是方思割據厲兵秣馬與東川董相公璋論
秦晉之親結唇齒之約

三年冬築羊馬城


四年春飢糞米斛四百文

長興元年秋兩川起兵討遂府利闕并黔南夔萬等州勝
示曰 蓋聞皇王御下恩信垂而叛離臣子事君猜忌生
而權變固不可割席而忍耻膠柱 移音開戶牖以啓式
長根芽而稔患以至舉戈問罪誓衆言征旁庇齊民式求




多福某國朝懿威受命莊宗自節制於西川遇鼎移於東
洛且以時變則變喪君有君因盡節而傾誠遂梯航而入
貢五年之內發運無虛積數五十萬緡粗給中朝之費此
則勵勤盡於天子欲表率於諸侯宇內皆知人誰不見至
於屢加官秩亦荷寵光不幸間謀潛興窺覷顯露於閩中
而立節就列鎮以益兵搖動我軍民控扼我嗾皆頻將異
議累具上聞異粗軼之懷柔希稍安於方面而朝廷不以
為德轉深其疑竟垂魚水之歡自絕雲龍之契其與東川
相公已聯姻好况密封圻朝聞雞犬之聲暮接笳鼙之響
地里雖分於兩鎮人心何異於一家勢比同舟事資共濟
令與東川點檢馬步軍十五萬人騎分路徃武信利閩路
黔巖等州間逐制置之由屯集之衆其行師法令別載條
章務 晏寧必無侵虐况王氏開國父霸成都東則鐵鎖

於瞿唐北則泥封於大散自是子孫失守將相離心全在
蜀之蒸人固未忘於霸主其因衆多之感舊奮武旅以關
疆佇遣四民各安其業然後花林步月錦水行春繁華何
讓於往年爵祿重新於此日凡百士庶宜體端倪 秋九
月辛酉朔丙辰救下閩州榜曰 昨者兩川以朝廷自生
疑貳不體忠良信讒賊之間言致諸侯之離德始則閩州
節度使李仁矩兩來奉使頻此覘窺謂於果閩之間便是
控臨之地妄興謀畫濫置節旄及奸計之遂心猶陰邪而
未已數聞奏報皆請兵師欲結禍階自為戎首所以東川
相公慮其稔惡須議權兇連興貌武之師共破豺狼之窟
自今月二十九日酉時得東川相公來書云二十五日夜
三更三點親領兩川大軍四面圍褻攻打閩州城池至其
日平明打破所到李仁矩首級并活捉到都指揮使姚洪



馬軍指揮使王景步軍指揮使賈暉等訖餘城下見機來
投指揮使都頭巴下便與賞給安存兼本城軍人百姓並
不傷動外餘拒敵黨類殺戮無餘此則天贊兵威人叶勇
力遂至元兇斬首同惡就擒我師四合以環圍遂壘一攻
而瓦解捷書雷迅喜氣山橫想與士民同多慶快見便乘
勝前進攻收利州只期反掌之間更俟克敵之捷 冬十
月辛卯朔辛亥左廂馬步都指揮使張業收下葭州并黔
南勝示曰 今月二十一日據峽路行討伐招收使狀報
黔南節度使去今月二十七日將手下元戎兵士拋本州
下水奔竄尋差衛隊指揮使朱偓部領左右飛棹并諸指
揮兵士乘戰船十五隻往黔南安慰至今月二日午時回
其黔南節度使今見在渠溪圍點元隨兵士及旋添水軍
却有五百餘人排比小戰船候寧江應接兵士到却欲歸

復本州其朱偓當日辰時部領戰船往渠溪襲逐至午時
與賊軍相見交戰趁下水約百餘里至鄴都頭殺獲賊
軍一百餘人斬黔南內外都指揮使郭太尉吳近思張瓊
等三十餘人奪得水甲器械不少收獲牌印四副其黔南
節度使則携餘黨乘小舟沿流直下忠州者竊以大舉舟
師遠征峽路旗鼓纒聞其下瀨雲櫓番指於上游連降郡
城繼收營監勢且捷於破竹聲有類於藝蓬今則更閱捷
書屢聞勝策况寧江軍以黔南為肘臂之地以渝合為饋
運之衢我已斷之彼何望矣節帥棄城而竄遁裨將兼隊
而追擒數俘馘以既多收鎧甲而亦衆指期蕩定以固封
隅凡曰軍民攸同快慰 十一月左廂馬步都指揮使趙
旻隱收下利州 十二月左右廂馬步都指揮使李仁罕
打破遂州殺節度使夏魯奇於是朝廷夷東川董相公一



族

二年天子歸罪安重誨後川主却修職貢

三年夏四月辛巳東川董相公擁兵來襲我至漢州昭武軍節度使趙廷隱討平之勝示曰蓋聞皇天無親唯德是輔明神不昧稔惡則亡逆賊東川節度使董璋包藏禍心良背盟約暴興士馬急寇封圻迎鋒而尋滅全軍單馬而竄歸本府昭武司徒統領大衆追襲餘妖則有前陵州刺史王暉觀其將亡因圖轉禍梟斬董璋父子雙獻其元保軍城待余旌旆念其智勇足可嘉稱且謀不自於衆人罪止歸於元惡旣除心腹之患永固邦國之基某見親往東川慰諭軍民次六月軍府將吏等詣衙陳狀請川主令公通押兩川公事


四年春觀察判官元溥上疏請行墨制曰伏以我蜀被

山帶江足食足兵實天下之強國也我公本仁祖義允武允文乃天下之賢主也以我公之賢托土開封取威定霸固得其宜矣而况內則有紅蓮上客參帷幄之謀外則仗細柳將軍專斧鉞之任率土之內足可保盤石之固泰山之安顧惟冗賤何補高明但念智者百慮必有一失愚者百慮必有一德狂夫之言聖人擇之樵童之歌哲王聽之敢聲蕩詞誠慙管見仰于朗鑒伏切怔忡竊以惟賞與刑國之利器懲惡勸善君之要權不可偏行尤須具舉歷觀往典備考前規或王命而不通或公室以多難列國率聞於專制諸侯或可以從權苟有利於生靈又何辭於通變昔來欽鄧禹擅命於征伐之間蜀主岐王承制於隔絕之間際俱非已實欲安人一昨鄰近諸藩間課上國有虎視狼貪之意阻君臣魚水之歡添益兵師動搖生聚况我公



恒修職貢不虧楚子之茅遽構說邪竟擲曾參之行以至
兩川軟血合從連衡列校齊心奉辭伐罪今則旋平狄穴
漸拓鴻基立功者悉望昇榮向化者皆思叙進方屬途路
有阻恩信未通二星不見於雲霄三蜀久憊於雨雪將期
勸善切在報功疇庸合議於策勳列爵宜遵於故事自今
以後若且行墨制以布鴻恩式副羣情無虧大體先宜曉
諭後可施行所冀設爵待功免授踰時之賞允宜稱霸之
宜 秋七月唐國進封蜀王冊曰朕祇膺天嘒虔荷帝圖
敷大信而仰法昊穹秉至公而俯臨億兆彰善殫惡必分
涇渭之流崇德報功敢忘山河之誓其有榮聯戚里任重
侯藩佐白水而中興為皇家而盡節雖勞緣註誤而竟保
忠貞跡鑿未通潮海之波瀾雙阻氣靈既定拱辰之光耀
如初表章皆驗於推誠琛贖遠修於述職得不顯其忠亦

懋以旌酬益救魚水之歡永契君臣之道爰求吉日乃降
徽章具官蓋某五緯佐天三山鎮地七年乃辨真為梁棟
之材十德俱全信是琮璜之器先皇帝經綸八極濟活兆
人李通首述其緯書鄧禹常參於霸業同心同德竟扶歸
馬之朝不伐不矜固恃濯龍之寵洎朕纂承鳳紀繫爾鎮
守龍城鐵石彌堅菁茅不匱山川險絕每虔向日之心玉
帛駿奔來助郊天之禮有臣若此當代何加董璋又作厲
階終萌逆節既辜恩於覆載欲嫁禍於勳賢疊以封章疏
其鄰道虔劉我生聚離間我忠良爾外示叶同潛懷憤激
衷聲言而誘諭彼既不回伺良便以誅鋤乃期自雪以至
敢驅叛黨徑逼仁封吹虺毒以傷人奮對牙而暴物爾則
妙施神筭徑出全師鼙鼓纔鳴旋聞落爪窠巢自潰已致
噬臍梓州之杖氣風驅涪水之狂波鏡淨解吾宵肝賴爾



韜鈴固當銘在景鍾豈止光於信史况復備輸懇款益驗
傾虔叙魯館之寅緣述沛中之事舊深心可見亮節期彰
不有疾風焉知勁草儻無異數局報崇庸由是並築將壇
顯陞王爵兼兩藩之奧壤啓一字之真封仍循益地之通
規別改旌功之懿號賜之旌鉞冊以輅車雖加等之寵光
爾皆不忝在睦親之義分子亦無慙於戲天鑒甚明爲善
者降之福祉君恩不黨立勲者厚以獎酬唯敬慎於始終
可延長於富貴勉承允澤來鎮坤維可授依前檢校太尉
兼中書令行成都尹劔南東兩川節度使管内營田觀察
處置統押近界諸蠻兼西山八國雲南安撫制置等使仍
封蜀王加食邑一千五百戶實封二百戶改賜忠貞匡國
保大功臣散官勳如故仍令所司擇日備禮冊命王者施
行 秋八月下教曰 取威定霸乃公侯權變之方捨爵

策勳乃皇王叙酬之典其或兵屯萬旅地廣三川周環列
國之山河奄有全蜀之封部儻不從權而徇衆則稽錄劾
以報功今稟命於中朝得專制而行賞但念承世家之餘
慶受旌節之殊榮窮奢極侈固斷意而不爲講武教民在
安邊而有作徃歲方勤述職務保永圖不幸諸藩搆成深
隙此際主兵將帥爭陳排難之功運策賓僚咸展出奇之
畧因興武旅分蕩渠魁累破竹以焚枯連開疆而拓土其
次諸司奉職庶吏推誠咸著勳勞豈忘獎答一昨聖上以
顯分忠佞遂降冊封礪岳帶河銘大君之異寵輅車珠寯
表列國之殊榮仍示優崇俾行墨制自上藩方之任下及
州縣之官凡陟幽明許先而後奏自可保不僭不濫之典
賞立功立事之人必無患於不均庶有觀於允當布告遐
邇咸使聞知



長興五年夏四月文武勸進即皇帝位大赦國內改唐長興五年為明德元年以副使趙季良為相掌書記毋昭裔為御史中丞掌書記李昊觀察判官徐光溥為翰林學士左右馬步軍都指揮使李仁罕趙廷隱張業侯洪實分掌軍權夏四月庚午朔地震興元節度使張虔劉武定節度使孫漢韶率部來歸由是盡得山南土宇兵甲秋七月己亥朔甲子帝寢疾而崩葬和陵廟號高祖遺制冊元子昶於柩前即皇帝位年十四翌日殺李仁罕并其左右佞者宋讓等數人初仁罕入蜀後充馬步軍都指揮使恣為奢豪益前蜀主元妃有國而欲娶之又懼高祖至是乃有跋扈之意樞密使王處回左廂馬步都指揮使趙廷隱慮其難作遂請殺之

三年春三月地震

四年晉高祖發兵侵昭武至劍門保寧軍節度使趙廷隱領兵拒退之是歲改廣政元年秋八月大水

二年三年邊陲無擾百姓豐肥以輔相得人也

四年夏四月蝗

五年春閏三月甲申西域胡僧來朝

六年至九年大有

十年秋七月殺宰臣張業以其判度支虐徵商稅於是籍沒其家樞密使侍中王處回免官致仕上以翰林學士李昊徐元溥為相伊審徵為通奏使知樞密院事上始親臨庶政事是月秦州節度使何重建鳳州節度使石泰顯率所部來歸

十一年十二年時平俗阜

十三年春始置貢舉



十五年夏六月大水入京城漂蕩五門以其城內溺死者衆於是大赦境內 秋九月東川兵馬都監王承丕反殺知府刑部侍郎郭延鈞并家族於是都指揮使孫欽率手下兵士斬王承丕首級奏送宣差容省使趙季札往梓州安慰夷王承丕家族

十八年冬上國舉兵攻秦州蜀失之

十九年戎瀘州獠賊羅駐雅反左街都巡檢使趙李文討降之

二十一年昌州獠反殺巡檢使趙漢瓊等於是左界巡檢使申彥瑋討平之

二十四年冊皇太子

二十五年行用鐵錢

錦里耆舊傳卷第七

錦里耆舊傳卷第八

起僞蜀廣政二十八年冬至乾德四年春

前榮州應靈縣令勾 延慶 纂

國朝收蜀十二月癸亥僞蜀太子秦王玄喆統領兵士至劍門時昭武諸路兵馬並已奔退遂回入城來

正月癸酉路前軍都部署王太傅全斌統領大軍至漢州界 蜀主差僞通奏使伊審徵走馬送降欵 十七日前

軍都部署請先鋒都監康延澤入城安撫 十九日大軍至昇遷蜀主具禮降 二月四日南路戰棹都部署劉太

傅光又收峽路至府是歲大宋乾德三年也 十七日蜀主與僞太后妃嬪發離成都水路下峽朝天先差弟僞雅

王仁贇北路走馬奉表曰 臣聞三皇御宇萬邦歸有道之君五帝垂衣六合順無為之化其或未知曆數猶昧存

亡致興天討之師實懼霆臨之罪敢祈英睿俯聽哀鳴臣



十五年夏六月大水入京城漂蕩五門以其城內溺死者衆於是大赦境內 秋九月東川兵馬都監王承丕反殺知府刑部侍郎郭延鈞并家族於是都指揮使孫欽率手下兵士斬王承丕首級奏送宣差容省使趙季札往梓州安慰夷王承丕家族

十八年冬上國舉兵攻秦州蜀失之

十九年戎瀘州獠賊羅駐雅反左街都巡檢使趙李文討降之

二十一年昌州獠反殺巡檢使趙漢瓊等於是左界巡檢使申彥瑋討平之

二十四年冊皇太子

二十五年行用鐵錢

錦里耆舊傳卷第七

錦里耆舊傳卷第八

起僞蜀廣政二十八年冬至乾德四年春

前榮州應靈縣令勾 延慶 纂

國朝收蜀十二月癸亥僞蜀太子秦王玄喆統領兵士至劍門時昭武諸路兵馬並已奔退遂回入城來

正月癸酉路前軍都部署王太傅全斌統領大軍至漢州界 蜀主差僞通奏使伊審徵走馬送降欵 十七日前

軍都部署請先鋒都監康延澤入城安撫 十九日大軍至昇遷蜀主具禮降 二月四日南路戰棹都部署劉太

傅光又收峽路至府是歲大宋乾德三年也 十七日蜀主與僞太后妃嬪發離成都水路下峽朝天先差弟僞雅

王仁贇北路走馬奉表曰 臣聞三皇御宇萬邦歸有道之君五帝垂衣六合順無為之化其或未知曆數猶昧存

亡致興天討之師實懼霆臨之罪敢祈英睿俯聽哀鳴臣



誠驚誠懼頓首頓首伏念生自并門長於蜀地幸以先君之基構得從幼歲以纂承只知四序以推遷不識三靈之改卜伏自皇帝陛下大明出震盛德居乾聲教被於遐荒慶澤流於中夏當凝旒玉殿之始闕以小事大之儀洎告類登園丘已來稽執玉持帛之敬蓋屬地途遐僻阻隔猷猷已慙先見之明因有後時之責今則皇威赫怒聖畧風行干戈所指而無前輦鼓纜施而自駭山河郡縣半入於華封將卒倉儲幸歸於文籍但念臣中外二百餘口慈母七十餘年日承訓撫之恩粗効孝愛之道實願克終甘旨冀保衰年其次則子孫之團圓守血食之祭祀伏乞皇帝陛下容之若地蓋之如天特軫仁慈以寬危辱臣輒敢微其故實上瀆宸聰竊念劉禪有安樂之封叔寶有長城之號皆恩歸款得獲生全願眇昧之餘竟得保全而為幸庶

使先君寢廟不為樵採之場老母庭除且有問安之便見今保全府庫巡過軍城不使毀傷終期臨照車書混其文軌正朔奉於靈臺敢布腹心恭聽赦宥臣謹率文武見任職員望闕拜首上表歸命披瀝肺肝以聞又上宰臣樞密使狀竊念頃自北京即隨先父洎臨西蜀嗣守餘基自量小國之封疆常阻大朝之正朔伏自皇帝登位宸極禮盛郊禋令預梯航願同臨照而以阻遠障險稍易歲時今則遠勞王師恭行天討有征無戰詎可抗威棄甲倒戈尋皆効順具陳降欵上達冤旒所希者存濟活於蒼生報劬勞於老母忠惟奉主孝則養親固於生平無所覲望許男銜璧已蒙解釋之儀虞舜垂衣保安全之望丹誠備寫雪涕難勝伏惟其官叶贊萬機懷柔八表迴敷恩信並及幽遐願垂前席之言特加敷奏冀遂保家之懇終養晨昏烏



反哺以知恩竊將比喻雀銜環而報德以荷生成倚賴感
銘陳詞固盡遐瞻德宇但瀝虔誠令專遣親弟仁贊詣闕
上表待罪勅蜀主省上表率文武見任官等望闕灑懇歸
命事具悉朕自皇天賚命率土樂推將期德報萬方不恃
威加四海乃睠益部僻處一隅苟黎庶之獲安非營經之
在意一昨災纏蜀地豐自并門既與王者之師遂授將軍
之鈇事非獲已須用至兵戎具真詞彼衆自敗下劔門而
賈勇指井絡以長驅中宵火燃兆庶何罪徑馳驛騎嚴戒
前鋒廣宣來者之懷徧諭弔民之意果能率官屬而効順
拜表疏以祈恩託我慈親迷乃寢廟封府庫而待罪保生
聚以輸誠朕方示信懷來不逼人險保無他慮當體優隆
國有舊章不違來請所宜悉也春寒想比清休書旨不多
及 四月一日殺西川兵士三萬人初前軍都部署瑯琊

公授降入城後應是西川歸降兵士並皆安撫相以黥
要起發赴京衆軍動搖將謀作亂乃引夾城內黥揀俾其
不意遂盡殺之 衆政呂侍郎餘慶知成都府軍府事偽
蜀指揮使全師雄反自稱王據漢州金堂縣三學山聚徒
數萬人攻成都并諸縣與官軍格鬪又陵州賊袁廷裕反
資州黃承浦普州劉澤時人號之劉硬弓昌州趙令等反
各據本州與全師雄應接所在州郡道路不通又嘉州馬
承逸反起犍為山進攻州城前軍戰棹副部署武懷節擊
破之盡戮徒黨 夏五月十六日蜀主到京朝見皇帝卯
時御大明殿蜀主見左右金吾六軍儀仗殿中省法物並
於殿前卓立三軍於明德門外着隊排立蜀主并弟仁贊
男玄喆等宰臣李昊已下三十二人五更三點自玉津園
乘馬到明德門西廊於幕次下馬至寅時着白衫小帽子



勒帛詣明德門立班閣門使李廷憲至蜀主遣官屬一員持表待罪將入大內奉傳宣旨釋放勅示諭並俯伏於地令通事舍人持起有勅取法上天廣覆下土既叶混同之慶永乘臨照之光方喜來朝何勞俟罪體茲睭待無至乾憂蜀主已下謝恩訖奉宣賜衣服幘頭靴笏等謝恩却歸幕次換衣服冠帶各乘馬入厚載門右銀臺門下馬閣門使李廷憲引蜀主入明德殿外幕次祇候見蜀主進

金器八百兩

玉腰帶二條

銀錠一萬兩

集賢相公叅知政事侍郎及文武官已下江南兩浙進奉使並立班陪位稱賀宣徽使承旨奉禮畢索扇下簾皇帝歸內皇帝自大內乘道蓮子上明德樓宣詔蜀王已下上樓立班奉宣慰諭諸軍於樓前逐隊安歸營後却乘道還

子赴大明殿宴奉宣宰臣蜀主已下並赴宴動教坊樂蜀主進

金酒器一副重一百六十兩

通龍鳳犀腰帶一條

宰臣節相已下進賀

蜀主朝見宣賜蜀主

衣一副六件

玉腰帶一條

金鞍轡馬一疋

散馬五疋

絹五千疋

錦綺綾羅紗縠衣着一千疋

錢三十貫文


金鍍銀棱瓷器四百事

銀漆棱器一千六百事

素漆器五百事

錦繡被氈褥二副

宅一院四百八十間



鋪陳借用什物全
又賜國母李氏

衣一對

金器三百兩

絹一千疋

借用銀器一千兩

錦被氍毹鋪陳全

蜀主第仁贊仁裕仁操男玄詰玄珪各賜

衣一襲

幘頭靴笏等

玉腰帶

銀器各七百五十兩

衣着各五百疋

絹各一百疋

散馬各一疋

金鍍銀鞍馬各一疋

錦被氍毹鋪陳全

雅王孟仁贊別宣賜

交倚水罐子銀大燄爐并銀器二百五十兩

尋有除目

李昊工部尚書

歐陽炯左散騎常侍

張元倣工部郎中

毋守素工部侍郎

胡韞司天少監

郭微膳部郎中

韓保昇殿中監

高諷太府卿

尹文舉駕部郎中

范禹偁鴻臚卿

劉暉少府少監

韓嶼庫部郎中

鮮于操祠部員外郎

趙元拱虞部員外郎

丘世隆比部員外郎


孟仁贊右神武軍統軍

孟仁操左監門衛上將軍

孟玄珪左千牛衛上將軍

孟玄珪右千牛衛上將軍

王昭遠右千牛衛上將軍



李進右千牛衛大將軍

景處瑋左羽林衛大將軍

袁可鈞左屯衛大將軍

高延昭左驍銳大將軍

蘇廷超清道率府率

李遵皓左監門率府率

授蜀王秦國公制

門下伯禹導川黑水本梁州之域河圖括象岷山真井絡之墟考職方之地圖北劍南之微道屬中原多事遠服未實山河既限於侯封車服遂踰於王制朕削平屬縣重正皇綱復周漢之舊疆寵綏羣后採唐虞之大訓協和萬邦六載于茲百揆時叙禮樂征伐之柄出自朕躬蠻夷戎狄之鄉咸修職貢一昨順先友而受律法時雨以興師舜干

暫舞於兩階湯網露開於三面予民之罪朕無愧焉咨爾僞蜀王孟昶挺生公族稟慶侯門值唐朝將季之辰襲蜀士已成之業撫彼郡邑久歷歲華而能察天地之惡盈知神人之助順盡率群吏來降大君望北闕以拜章指南陔而請命得不開懷禮遇撫弱流恩官班特越於彝章保護彌光於大信豈比夫魏封劉禪纔升驪騎之班隋待蕭瑀惟列莒公之號今茲示寵以欲從人命作帝師俾容開府帶相漢尊車之貴列秦川萬戶之封併而授之斯為異數仍加祿俸用表優隆爾宜思前代之命官體我朝之加等勉荷非常之澤無忘匪懈之心服佩恩光往踐厥位可封秦國公

授孟玄詰兖州節度使制


門下朕聞魏時降蜀君臣俱列於散官隋帝平陳子弟不



聞於封爵皇家順景風而行賞同時雨以濟師當敵境未
賓靈下戒嚴之令暨危邦請命雲垂利澤之恩矧復降婁
古封掌武崇秩曲阜是伯禽之國太尉乃周勃之官山河
距九州之雄紱冠冕三三之貴舉爲賞典斯實異恩僞
國長孟玄喆禮法矜莊神彩英秀駢途於早歲播令問
於蜀川正朔未同於列國而人稱世子車書既混於大朝
而自是良臣以爾昔在三川常居二職贊厥父之効順保
祖母之高年予嘉乃心豈限彝制是命陟將壇於東夏整
武事於南宮憲秩封侯用光殊渥將表臨戎之寄更增光
祿之勲爾其分天子之憂勤出將軍之令與其改絃易
調不若從容以安民布政頒條予誠有望榮家奉國爾其
勉之

夏六月蜀主薨遺表曰

臣聞大數有限萬化無窮歷觀今古以攸同在賢愚而豈
免將啓手而歸土再瀝懇而聞天臣誠悲誠戀頓首頓首
伏念臣謬承父業竊據坤維數千里之山河四十年之統
攝雖有臨深之懼且無事大之規是以遠勞王師恭行天
討上思老母下念生民潛收拒轍之心旋露投戈之請伏
惟皇帝陛下納汙道廣來遠恩寬遐頒彩鳳之書遽釋牽
羊之罪伏自遠辭錦里獲覩瑤墀帝澤天恩曾無虛日皇
華驛騎長是盈門仍賜官勳方圖朝謝不謂偶營疾疢遽
覺沉微伏蒙皇帝陛下軫睿念以殊深降國醫而存至比
冀稍聞瘳損何期漸見彌留將別聖朝即歸幽壤絕拜章
於雙闕一息雖存命易賈於病躬五神已耗伏惟皇帝陛
下長新鳳曆永霸鴻圖鎮居四海之尊永作兆民之慶臣
之老母臣之孤遺仰荷聖恩復何憂臣無任瞻天戀聖涕





泗激切屏營之至

夏六月十九日榮州賊楊德暉等及陵州袁廷裕助五千餘人圍逼州城是月二十六日南路都部署彭城公討平陵州賊袁廷裕二十九日楊德暉潰散所在縣鎮遮截梟略盡 秋九月嘉州指揮使呂翰反殺前軍戰棹副部署武懷節據州城自稱相府是月漢州山菁賊全師雄死徒黨潰散 冬十一月彭城公擊呂翰破之收下嘉州

四年春三月資州賊黃承浦榮州賊楊德暉等歸投起遣上京自揚德暉趙令等脅從夷獠依山擁眾叛離不順朝化南路都部署彭城公命偏將討平之今則污萊之囚盡闕崔蒲之盜漸除萬民知歸兩蜀寧靜觀堯湯之代權億兆之心矣


錦里耆舊傳卷第八終






國家圖書館, NATIONAL CENTRAL LIBRARY, TAIWAN, R.O.C.






國家圖書館, NATIONAL CENTRAL LIBRARY, TAIWAN, R.O.C.





國家圖書館, NATIONAL CENTRAL LIBRARY, TAIWAN, R.O.C.





國家圖書館, NATIONAL CENTRAL LIBRARY, TAIWAN, R.O.C.

